

四庫全書

集部

欽定四庫全書

集部

盧溪文集卷

一至六

詳校官奉允

臣璫五珠

主事_臣呂雲棟覆勘

總校官知縣

臣楊懋珩

校對官中書

臣潘奕雋

謄錄監生

臣黃熙純

欽定四庫全書

集部四

盧溪文集

別集類三

宋

提要

臣

等謹案盧溪文集五十卷宋王庭珪撰庭珪字民瞻廬陵人政和八年進士第調茶陵丞與上官不合棄官去隱居盧溪胡銓謫嶺南時庭珪以詩送之有癡兒不了公家事男子須為天下奇語後坐是流嶺南至孝宗朝

召對賜國子監主簿乾道六年復除直敷文閣年九十三卒卷首載胡銓等序後附錄周必大等誌狀題跋敘述始末甚詳生平著述頗富有六經論語講義易解語錄及滄海遺珠鳳傳山叢錄等書今多散佚惟此集猶傳庭珪抱經濟才鬱而未發故雄直之氣時流露於詩文間劉澄評其文在廬陵可繼歐陽之後楊萬里嘗從之遊謂其詩出自少陵昌

黎大要主於雄剛渾大蓋亦得其近似云此
本首載古近體等詩二十五卷次載書序及
各種雜文二十五卷其脫稿不全者則附於
簡末云乾隆四十四年七月恭校上

總纂官

臣紀昀

臣陸錫熊

臣孫士毅

總校官

臣

陸

費

墀

盧溪文集原序

昔人以文章比珠玉六經言珠玉多矣然易不過乾鼎
之卦詩不過瑱佩六珈衡琚瑤書不過璿璣玉衡螭珠
璆琳琅玕天球而已春秋不過寶玉龍輔剝圭紀璫玉
璣佩璆而已唯戴記周官之書言之為詳且悉有以璧
為貴者如穀璧蒲璧蒼璧圭璧加璧之類有以圭為貴
者如土圭鎮圭桓圭信圭躬圭青圭瑑圭珍圭駟圭琬
圭琰圭裸圭穀圭端圭白圭廣圭大圭之類有以玉為

鬱甍不琢有邱壁羨渠眉之類有以大為貴者如大圭
大璋大璜之類有以長為貴者如信圭躬圭穀圭邊璋
七寸瑑璋圭璋八寸桓圭琬圭琰圭璧琮大璋中璋九
寸鎮圭裸圭四圭尺有二寸土圭尺有五寸大圭長三
尺之類又有五德焉潤澤以溫仁之方也鰓理自外可
以和中義之方也其聲舒長知之方也不撓而折勇之
方也銳而不拔絜之方也又有十一德焉溫潤而澤仁
也縝密以栗知也廉而不剝義也垂之如隊禮也扣之

其聲清越以長樂也瑕不揜瑜瑜不揜瑕忠也乎尹旁
達信也氣如白虹天也精神見于山川地也圭璋特達
德也天下莫不貴者道也嗚呼珠玉之可貴如此而以
文章空言配之不已誇乎廬溪先生以明經中科而宦
不達落落與時左凡憂悲愉快窘窮喜怒思慕怨恨無
聊不平有感於懷必於詩文發之紹興壬戌秋銓坐不
肯與金人議和且乞斬主議大臣二人銓削爵竄嶺表
先生送行詩有云名高北斗星辰上身落南州瘴癘間

人爭傳誦至達權臣耳奏下江西帥司鞠治久之竄辰
州時紹興己巳秋七月壬午也先生貶八年會權臣薨
得旨自便先生思益苦語益工蓋如杜子美到夔府後
詩韓退之潮陽歸後文也人得其片言隻字寶藏十革
雖王府所謂珠盤王敦未足為珍由是觀之以文章比
珠玉未足過論先生自隆興癸未至乾道辛卯凡兩賜
對對必坐免拜王音諄諄問勞款款退則賜茗藥束帛
不貲書生之榮至矣銓頃於榻前論先生人物云雖老

宰相材也蓋用狄梁公薦張柬之語上不以為過然則上之知先生深矣儻未死其見用于時殆未易量也乾道壬辰六月長沙布衣劉君光祖與其弟紹祖寓書安成彭君叔夏走千餘里抵廬陵乞為先生集序固辭弗獲遂書以畀叔夏先生姓王名庭珪字民瞻云敷文閣直學士降授左通直郎提舉江州太平興國宮廬陵縣開國男食邑三百戶賜紫金魚袋胡銓序

李杜詩多於文韓柳文多於詩世之不知者便謂多者

為所長少者為所短此殆拘牽之論而非園機之士夫
賢哲之於世學以為主用之則行其發而為言有所謂
不得已者其將激於中而發於外者乎即是而為詩即
是而為文文即無韻之詩詩即有韻之文所以三百篇
之美刺即十二公之褒貶蓋本一致如此則李杜可名
長於文韓柳可名長于詩又奚可以一偏觀耶廬溪先
生王公民瞻江鄉大手以詩文馳聲者蓋六七十年其
少時志尚已高視功業如拾芥既齟齬則發而見諸紙

上皎如日星鏗如金玉芳如芝蘭浩如江河自然有一
種奇趣他人之所強勉而公則信手拈來渾然天成公
亦非有心於此是乃所謂激于中而發於外者其詩之
多於文非此長而彼短也儒林於詩久以厭飫而文乃
未廣有友劉江伯深慨然編集詩也文也相與並行於
世然後公之所以無窮者不遺矣書銘記序諸篇嚴厲
有法而上皇帝書并盜賊兩論其經綸宏傑不減陸贄
杜牧豈徒文而已哉伯深欲余為序余喜伯深之識而

不可默也書而冠其篇首淳熙丁未臘月甲申朝奉郎
試右諫議大夫謝諤書

紹興八年故資政殿學士胡公以言事忤時相黜又四
年謫嶺表廬溪先生以詩送其行有癡兒不了公家事
之句小人飛語告之時相怒除名流夜郎時先生年七
十矣於是先生詩名一日滿天下里之士愛先生者謂
詩之禍從古昭昭也先生不戒又欣然犯之適以濟權
臣之威成小人之名此先生之禍也亦先生之過也或

曰先生何過哉先生言直而詩工耳言不直詩不工世無傳也世有傳矣不見媚於明必見媚於幽故庭草隨意之詩空梁燕泥之詩飛燕昭陽之詩不才多病之詩言非直也詩工而已耳詩工而言非直猶且小者逐大者死況先生之詩工而言直耶先生何過哉濟權臣之威亦稔其惡先生成小人之名未若小人成先生之名先生何過哉未幾時相殂先生得歸又未幾上踐阼初召除國子監簿再召除直敷文閣年餘九十耳目聰明

賦詩作文不見老人摧頽之氣朝廷想聞其風天下傳
誦其詩禍先生者何知其非福先生者乎嗟乎天人之
理其紊也或勝之其定也或正之不觀其定而觀其紊
則古之聖賢厄於小人者皆過也獨先生之過也乎先
生王氏諱庭珪字民瞻登政和八年第調茶陵丞與上
官不合棄官去隱居廬溪者五十年自號廬溪真逸少
嘗見曹子方得詩法蓋其詩自少陵出其文自昌黎出
大要主於雄剛渾大云清江劉清之子澄評先生之文

謂廬陵自六一之後惟先生可繼聞者遽焉先生之孫
澹及曾孫澂及其門人劉江銓次先生之詩文凡五十
卷將刻棗以傳而太守朱公子淵復刻其詩於郡齋澹
屬萬里序之萬里嘗侍先生之杖屨聞先生之誨言者
欲辭敢哉淳熙戊申九月晦日門人朝奉大夫新知筠
州軍州事楊萬里序

欽定四庫全書

廬溪文集卷一

宋 王庭珪 撰

古詩

題宣和御畫

王鎖宮扉三十六誰識連昌滿宮竹內苑寒梅欲放春
龍池水暖鴛鴦浴宣和殿後新雨晴兩鵲飛來向東鳴
當時妙手貌不成君王筆下春風生長安老人眼曾見
萬歲山頭翠華轉恨臣不及宣政初痛哭天涯觀畫圖

徽宗皇帝臨御日久海內無事唯不忘翰墨之娛見
者知其為御畫也臣既獲仰觀撫卷太息思宣政間
當國家太平極治之時景物宛然不覺流涕乃再拜
稽首而賦是詩紹興丙寅三月望日小臣王庭珪謹
題

仙人春宴曲

高樓玉珮搖春風銀槽壓雨珍珠紅天留曉月十分魄
飛光下照仙人宮瑤姬半醉搗鼉鼓綠鳳吹笙黃鶴舞

雙成翠袖織藕絲麻姑行厨擗麟脯金盤燒蠟夜未央
從妃進果蟠桃香坐上花開人未老他日重來花更好
三千年後忽相逢再約羣仙醉蓬島

觀駱元直經進江南形勢圖

異時漢網疎天討邊馬來嚙江南草石頭重戍豈無兵
將軍不識丹陽道至今戰骨埋秋霜傷心不忍問耆老
龍蟠虎踞昔何雄赤壁濡須在眼中潯陽江水射蛟處
旌旗拂天來向東艤艫塞川不敢下昔人曾此破曹公

橫江九道波翻屋試請輕兵渡淮曲夜入長安人不知
應見畫圖心已熟他日將軍按此圖鼓行而西如破竹

長沙北禪覽古

寺有吳王女墳

明湖漲天光春雲如粉碎吳王宮女罷吹簫象牀玉枕
今安在桃李初開映綠池綠池水暖搖花枝聞道只今
池上月照見吳王繁盛時當時粉色艷月彩今日古墳
烟草衰草衰不見吳宮事唯有月下孤猿啼猿聲哀苦
聞不得又恐清曉催黃鸝

方外菴聽惠端彈琴明日赴李似矩尚書招

浮雲捲盡天無風青山銜日猶半紅誰彈烏啼夜鶴怨
平明結客長安中大顛初識韓吏部清瑩亦叅裴相公
尚書意欲清邊圉手挽天河作霖雨響泉韻磬應自攜
昵昵莫為兒女語為陳古操有平戎此曲聊堪佐旗鼓

遊青原呈王元勃舍人周秀實監丞

異時黃魯直嘗賦青原詩至今青原山名與星斗垂自
從有宇宙孰能磨滅之昨日從大旆上讀前人碑欲學

下一語自覺落筆遲我等如淇輩後世誰復知治君千載人治中同一時兩公俱大手妙語仍崛竒得句未肯吐神物慍護持光艷出月脇當留照巖扉

舟次白沙

朝發螺浦湄暮宿白沙口初為夜行計有物應掣肘山雲四面起風濤半江吼落帆危石磯就枕不敢久林深鳴鶴鵲村遠聞雞狗夢覺知月明破篷見牛斗起視天色清解纜欲放溜浪頭聒天響掀簸入我牖蒲帆未及

張篙師復回首渡頭有古祠壁畫雜怪醜舟人相與言
勸我酬神酒出處本細事陰晴亦常有我固不問天豈
問土木偶

寄胡邦衡兼簡陳僉判黃書記

斯文久寂寞誰應擅雕龍萬事問伯始今復得此公
濤瀾翻筆舌錦繡蟠心胷平時吐佳句逸氣如長虹制策
收俊異行當推選鋒元龍湖海士江夏無雙童詞彩俱
秀出春葩發青紅鏗鏘排律呂純音玉琤琮草木吾臭

味坐隔神螺峰遙聞王荆產長松想清風安得賈餘勇
提戈譟其中且願試音響徑須撞巨鐘

向衡州生日

今右相與
公同生日

嵯峨閭闔西風回赤霄夜半天門開昂星麒麟下穹昊
兩家同日生公台兩公為誰張與向人物堂堂真漢相
願公接武未央庭禁直金鑾對方丈

張持操攜徐獻之侍郎書見訪兼出示著述中
興論諸雜文為賦詩一篇以文軸還之他日

亦錄寄獻之也

君不能徒步上書獻天子又不能移書帝城結王公欲
將筆力扛九鼎紙上有說能平戎宣和治極久忘戰北
來邊馬嘶淮甸是時猶屯百萬師無人北向放一箭大
臣搏手知何為草間公卿兒女啼至今謀國無上策讀
君斷藁令人悲君家人物照青汗曲江猶識胡雛亂他
年論事要回天應向荊州尋好漢

過蕭瀧廟

瀧江欲度虹為橋瀧濤春擊蛟魚跳瀧頭有廟非一朝
瀧民猶傳神姓蕭殿脚插入白鷺腰青原舞翠挹茗堯
朱甕日出煙霧消碧瓦不動磨青瑤忽然飛電掣紫霄
天為借怒生奇颺遊龍揮雨洗汰寥桂花墮落香雲飄
百年古木號夔魑鼉能擊鼓鸞吹簫官船賈舶膽欲焦
廟前泊櫓不敢搖楚詞跪奠設漿椒瀧之靈兮或可招

送陳邦直知縣

道邊車馬來不休傾城出送陳太丘太丘愛民如父母

故令民作嬰兒愁各持杯酒塞行路衆人欲挽我獨不
我記殿前初射策臚傳高名落九州同年衮衮上臺省
公獨執板拜督郵况茲小縣天一陬不煩細民遮道留
繡衣飛章動冕旒行必召對螭坳頭君王端問活國計
大畧要洗儒生羞

贈別黃超然

我生不識黃太史猶及諸老談遺事藍田生玉海生珠
謂君眉目無乃似誰作江西宗派詩如今傳法不傳衣

句中有眼出月脇密付嫡孫人未知宗風後必喧人口
雲夢更須吞八九他年拈此一瓣香獅子窟中獅子吼
寓郡齋過清閼軒與高虞卿夜話

戶牖隣清閼深夜客扣關開門見脩竹人與竹俱閒雨
竹窗外響風從屋頭還羨君屏百事讀書蒼翠間刺口
談治亂筆挾風霜寒更覽珠玉文洗我冰雪顏歸來興
未盡危坐聽珊珊

趙逢源今春當赴省試以事失期乃督錢綱往

行在且欲觀母后回鑾之慶作詩速其行

去年秣馬望行宮飄然氣若摩霄鴻不學提攜百金劍
不倚能彎兩石弓徒誇讀書飽藜莧筆陣欲敵千人鋒
要登月窟取官職不使官出兜鍪中丈夫功名自有日
春闈已過落花風今當獻計隨羣吏到時萬井歡聲沸
慈寧殿前催赴班看君入賀鳴鞭鼻

送向宣卿赴朱相公參議

旄頭彗天天狗墮一日中原作奇禍金竿突繞都城光

鐵馬橫嘶御街過
邇來十年不解兵
盜賊軍書急星火
將軍藩身養脇疽
帝命相公期必破
指揮貔虎下天來
奮臂一呼皆袒左
相公元是帝股肱
提師辟士收豪英
君才累試當劇郡
羣兇落膽知威名
麾下傳聞有飛將
一箭曾射欃槍星
公謀豈止當十萬
要挽天河洗甲兵
君不見河陽軍烏
重脣參謀初拔溫
處士遂令冀北馬
羣空石洪亦自河
南至又不見裴晉
公取淮西幕下正
用韓退之乃能夜
縛吳元濟至今留
得平淮碑如今相

公開幕府豈減烏公與裴度席卷江湖波浪清
貂鼎勲庸歸自取

送吳叔舉主簿往清江受納秋苗

田頭作穀催入塲一半白著輸官倉廬江主簿喜懷檄
放船椎鼓開帆檣蕭灘老農公事畢夾道歡呼羅酒漿
笑言歸去喚妻子今年租米兩平量

秋夜西園獨步

清夜遊西園竹影亂秋月宮色湛虛明林光益奇絕人

間睡正著那知此時節坐觀衡陽移頃刻風烟別沆瀣
洗天宇一飲醒毛髮氣與南山高青蒼助施設池塘收
綠淨星斗轉空闊微雲點太清須臾亦自滅明朝問此
境勝處不可說却恐雞三號開門走車轍

劉晞揚貧甚爨烟不屬而讀書不輟作詩遺之
以激其志因叙其貧之所以然冀當塗有聞
之者

荷鋤初讀書中原已鼎沸輟耕仰太息衣食尚卒歲喧

呼傳點丁田廬忽湮替產盡猶索租從何出租稅迺知
天寶後信如石壕吏君門九重深旗戟森兵衛朱轡背
相望莫肯察凋弊賴子天資高追琢自成器時能從諸
生扣門來問字長篇爛溢目春葩吐奇麗饑雖不堪煮
要自飽風味迺翁昔好事賓客常滿位小兒聽客語炊
甑忘著算豈慮飯成糜邇來糜亦廢時能饋升斗與子
黔突喙

送王舍人超武

王郎遠器宜廟堂胡為奔走天一方吳越相望峙雄壘
雙旌再開南斗傍手攜仙人綠玉杖坐褰刺史赤帷裳
平生廣莫意萬里眼高四海無相當舍人舊班紫宸陛
天馬豈受青絲韁騎驢到部正閱歲飄然鵲舉摩天翔
嬰兒十萬啼塞路各遮馬首持杯觴忽聞半夜發輕舸
追走不及徒悲傷繡衣飛章有巨力不須州民投皂囊
正恐君王知治狀便向劔履趨明光鰲頭蓬萊在平地
日邊除書細作行

--	--	--	--	--	--	--	--

欽定四庫全書

盧溪文集
卷一

盧溪文集卷一

欽定四庫全書

盧溪文集卷二

宋 王庭珪 撰

古詩

和劉美中尚書聽寶月彈桃源春曉

何年鑿源開
混茫桃花兩片吹紅香烟消遠浦生微陽
漁舟誤行溪水長溪回岸轉山隙光疑有絳闕仙人房
居民爭出羅酒漿花間笑語音琅琅抱琴釋子眉髮蒼
響泉韻磬鳴長廊能談往事悲孟嘗昔時臺沼今耕桑

又如勇士赴敵場坐令遊子思故鄉清猿抱木號鴻荒
孤吟劃見丹鳳翔曲終待月西南廂重調十指初不忙
如見古畫秦衣裳春天百鳥爭頽頽桃源歸來今已忘
彈到落花空斷腸

和李巽伯少卿見懷

巽伯靖康中
以少卿使金

騎鯨仙人本仙胄不應暴落饑蛟口長庚却復下人間
島瘦郊寒皆縮手篇章邁往無古初不共曹劉轍俱蹂
此邦雖陋江山雄異時間出歐陽九公今詩句滿江山

似覺哀容得春酒筆端獵獵生風雷宵次煌煌煥星斗
生兒了事正作癡亦恐癡兒未能了頃年敵騎獵夷門
兵孥不解誰當剖大臣薦公來洛陽舌翻波濤驚朝堂
飛龍偕馬出建康北兵夜走塵沙黃是時帝坐八綺窻
擬歌風起雲飛揚

寅陂行

安成西有寅陂溉田萬二千畝歲既久官失其籍
大姓專之陂旁之田歲比不登邑丞趙君搜訪耆

老盡得古跡迺浚溪港起堤闕躬視阡陌灌注先後各有繩約俾不可亂是歲紹興十三年適大旱而寅陂溉萬二千畝獨不稿民賴其利咸頌歌之國家方下勸農之詔法有農田水利實丞職也然緣是而偽自增飾以蒙褒顯者世不為怪由是水利為虛名今寅陂功績崇崛丞不肯自言部使者終不及省察某出城別君東門外逢寅陂之民塞路涕泣言此為叙其事作寅陂行不復緣飾皆

老農語也葉當世有採之者紹興癸亥十月望日

書

安成城頭烏夜宿啼鳥未起雞登木傾村入城來送君
馬首摩肩袂相屬但有龐眉不識名何物老翁出山谷
老翁持酒前致詞家住西村大江曲大江兩岸皆腴田
古有寅陂置官屬自從陂廢田亦荒官中無人開舊瀆
公治故道堰橫流陂傍秔稻年年熟今年雖旱翁不憂
田頭已打新春穀誰云此陂會當復老父曾聞兩黃鵠

嗟哉如君不負承躬行阡陌勸農耕監司項背只相望
風謠滿路胡不聽胡不聽寅陂行為扣天闕叫一聲

廬陵行并序

廬陵別駕謝公前年初下車適蕭富二盜作亂州
人震恐別駕提兵不閱月兩巨寇縛致麾下境內
遂安今當還朝州人懷之盧溪王某為作廬陵行
以慰其懷思之意錄以為別

廬陵地控虔與洪孤城斗絕吳楚東連年賊兵塞官路

烽火照夜旌旗紅治中來時正逢此自請按行山谷中
禾州吉水方震動縛取兩渠來繫鍾亮徒披靡拜麾下
願持田器為良農凱歌歸陳破賊狀捷書飛入甘泉宮
甘泉侍臣知姓氏天子往往聞其風謂當到關問邊事
邊上如今塵不起但把長牋造鳳樓莫說渡河挑馬楸
此公淹久佐一州安用州民遮道留州中老人錯料事
此公行立螭坳頭

和程子山舍人贈高虞卿

南宮四海英俊場閱人雖多無此即御史傳呼主司出
遙瞻紫案金爐香簾垂咫尺斷還送閉戶設棘園高牆
卷堆封彌充棟宇筆浸滄溟開混茫麟臺學士喜得子

時子山
為館閣

如獲寶鼎聯芝房明日都城始傳榜聲名烜赫

無三張平生知己萬不一世有若人安可失方調鼎味

薦鹽梅桃李何心並

滿浪反

佳實論經射策未足論挽取

功名看他日同門笑語夜相過起看北斗插天河凌晨
鳳閣拜座主門生來賀爭肩摩一時人物盡豪傑太平

為寶非嘉禾

題羅疇老家明妃辭漢圖

李伯時作明妃豐容
靚飾欲去不忍之狀

明妃辭漢出宮門豐容靚飾朝至尊至尊左右皆動色
明妃欲語咽復吞三千蛾眉塞天閭帝獨不識王昭君
顧影徘徊復良久尚冀君王一回首當時自倚絕世姿
不將賂結毛延壽可憐朱網畫香車却來遠嫁呼韓邪
不如歸州舊村女三幅羅裙兩髻了陌上花開大隄暖
細雨春風歸緩緩寧從禁籞落胡沙長路漫漫碧雲斷

忽看漢月照瓊表淚濕彈絲錦臂鞦龍眠會作無聲句
寫得當時一段愁

送向宣卿往衡山兼寄胡康侯侍講

朱陵衡岳
仙人所居

公是行緣胡丈招隱公
有雪冤錄歷詆諸監司

海內甲馬未盡休豪英為時當出謀天生奇才必有用
何乃相率居岩幽胡公人品今第一汗漫久作朱陵遊
朱陵窟宅倚蒼翠此公招隱安可留九廟今誰起頽壓
四方正爾煩誅求我聞昔時元刺史春陵地分天子憂

少陵作詩頌其事至今人傳元道州公為道州績尤偉
誰為再作春陵謳孤城疲卒捍狂賊高論力詆庸兒羞
安得如公數十輩叅錯天下為邦侯京洛腥羶不難掃
潢池寇孽不難收願公早請尚方劍先斬佞臣張禹頭

贈齊軒仲素老

并序

齊軒仲素老自安成至京師遊螺川凡十餘年暇日
偶過其居齊軒面東一山峰曰秀嶺烟雲草木翠
色依然真逸老人戲作詩招之以代東山移文

云

秀嶺明東城飛翠橫空斷烟霞互滅沒爽氣浮清旦旁
連仙人居樓殿出天半金龍蟠繡柱銀榜開琳館齊軒
面青葱下瞰綠篠岸我嘗醉其上謳吟雜悲歎一時賢
士夫車馬共遊欵當年二學士落筆瀉銀漢曾賦齊軒
詩字字星斗爛事逐雲雨空鬼錄尚可按重來兵火餘
觸目自悽惋唯有軒前山秀色還舊觀曉猿驚未已歸
袂何必挽胡為走塵埃廢此奇一段山靈亦可畏移文

定嘲玩

二學士乃伍醇父
劉偉明立名賦詩

寄黃子龐兼簡鄒德裕

天狼窺太虛戎馬斷行路一別常萬里寄書何由數
識君英妙時疊疊見佳處當年松柏姿已有廟廊具
比常覓新作險絕聞奇句探珠滄海底秀色不受污
筆端百斛鼎胸中九經庫高文動場屋仍傳渭上賦
豈但凌三都自使強敵怖鄒郎挺忠烈英英起門
戶同遊氣槩中風雲生指顧獨念蓬室士無因陪杖

屢相望隔章水欲往不敢渡拏舟弄明月正恐蛟龍怒

贈康元章

并序

西昌康元章自言頃從防禦使劉紹先軍屯廬陵
日楊勅兇焰方熾間道走九江謁大丞相朱公陳
誅討之計蓋勅本猾賊藏姦宿亂日欲奮獨憚紹
先縮頸不敢搖賴丞相果發兵捕勅盡擒馘之未
幾丞相與紹先皆罷去元章亦歸耕隴上今欲裹

糧奔行在而有羈旅窮餓之厄為作詩以壯其氣
亦庶幾故人有哀之者

康郎讀書本勃窣羞作儒生酸到骨偶逢四海未解兵
氣如秋鷹眼如鵠布衣杖策丞相前官軍盡掃長蛇窟
焦頭爛額已論功況子當年陳調曲

送葛德裕并引

德裕汾檄之豫章兼聞當督戰船往池陽因書寄
別

捧檄困米鹽戴星入州府官卑強趨走出語不媚嫵坐
此觸駭機三人忽成虎况聞郡公曹士論極患苦禍福
在牙頰驕氣溢眉宇念君鸞鳳栖孰若黃鵠舉負材淹
薄領擺脫即騫翥高興動長川挿旗催轉鵬帆經一柱
觀清風九江渚蛟龍蹙橫波樓船照秋浦茲遊定有得
因之壯心膂丞相新開藩門闌歷吳楚豪英氣槩中人
物槩可數相逢一笑樂細與論今古若問山間人披蓑
釣烟雨

題秀光亭壁餞劉世臣劉仲美并序

余遭小人之謗諸友嘗憤惋切齒欲起而攻之會
劉世臣劉仲美當赴省試諸生設祖道于秀光亭
酒既行忽報小人敗績於是滿坐懽叫獻酬紛錯
終夕酣暢以為樂蓋小人既衰吾道必盛且以卜
二君明春光大之兆歐陽巨明作序以紀餞筵之
盛盧溪老人賦詩以贈行

飛雨灑簷角車騎散巖隈臨池張翠幕衆賢會高臺

坐中蟾宮客再占北斗魁

北斗第一至第四為魁世臣前舉郡魁今第四名

復有南巷阮

謂仲美也

少年負英才兩公俱博雅胸臆天

所開明春試殿陞筆力翻風雷臚傳姓名出聲聞落

九垓今宵且盡醉須覆掌中杯朝來得好語仍聞小

人災請觀盧溪老談笑消姦回見敵未嘗却坐令敵

傾摧庸兒不量力自倒非人推舉此卜二友否極終

泰來

送李亨仲赴荆南辟

少年膽氣橫秋煙腰間櫛具森龍泉出門萬里探虎穴
錦帶雕鞍明積雪洞庭木葉飛霜風將軍秉旄西擊戎
旌旗戈甲照湖海櫓槍欲滅胡天空須君磨盾作露布
揄羽來奏明光宮

麗人行

讀大業
拾遺作

桃葉山前宮漏遲宮人傍輦持花枝君王喜憑絳仙立
殿脚爭畫雙長眉欲把琵琶彈出塞結綺臨春時事改
井邊忽見張麗華忍聽後庭歌一再

早行

羣雞鼓翼天欲光
井上梧桐生微涼
殘星爛爛或出沒
初日淡淡開青蒼
楚妃臺邊曉雲碧
伏波廟前秋草黃
騷人辛苦拾何物
沅有芷兮今已香

盧溪文集卷二

欽定四庫全書

盧溪文集卷三

宋 王庭珪 撰

古詩

謝張欽夫機宜惠靈壽杖

九疑連綿青未了，柳江擘出蛟龍吼。
雷公霹靂搜巖幽，化為鬱律黃蛇走。
飛電迸火出奇節，黃蛇走立僵如鐵。
攜看玉女洗頭盆，柱上九疑探禹穴。
莫挑馬箠渡黃河，莫扣天門閽者訶。
但掛百錢時一醉，從教風雨濕漁蓑。

青錢學士年方少年少羞為老人調即看飛步上蓬瀛
別有青藜夜相照

魏彥成寄示桐川琅琊送行詩集奉次柳字韻

一首系于卷末

少年班玉墀美若靈和柳一麾出銀臺風流亦不朽琅
琊古名郡屢移賢太守天子憂遠民謂公極其厚林甫
既當國不便珉與玖何如訪醉翁翁意不在酒

次韻張虔州兼呈向宣卿

賊鋒繞章南殺氣動秋色主將初無謀突出誰與敵君
門九重深羽衛森旗戟我欲獻奇計何由吐丹臆萬言
一杯水平生幾兩屐時雖急搜賢毀譽皆失實頃聞向
衡州姦盜俱惕息人材有如此宰相安可失

和李巽伯韻贈甥劉志道

年少嘗讀書復挾琴與醫世無識真者持此將安之古
調不詠俗空囊不貯貲結交名公卿雲間接風期披烟
對珠玉常恐生微疵向來壁上弓落杯輒自疑此事一

了了昔賢當並馳李卿句有眼妙語真而師

存存閣

王郎身如椰子大胸蟠萬卷猶能載少年著足名利場
歸來卜築紅塵外太虛為室月為燭四海諸公常所會
窮閭陋室天下貴駕奴豐車多覆敗坐收浮念得此生
如鍊真金豈常壞是中本自無虧成壞與不壞亦何在
請君直下賦一言要識所存當默解

次韻周秀實觀李觀察勒兵

霜風獵獵吹旗旌將軍束裝來勒兵白鷺洲前雲鳥合
青原臺上山川橫李侯凜凜萬人敵匹馬橫行沙塞北
至尊殿上親賜名生坐閭羅官柱國提兵括寇來江西
採取賊窟如連雞軍中起距多暇日却學臨淮親校旗
中興猛士如吼虎二十八將隨光武要看麒麟第一功
金印垂腰光耀組

送陸景莊提幹

驅車越荆吳轍跡走欲半是時親戚多烜赫踐華貫中

有衣繡人持斧下霄漢利權炙可熱冷語冰未泮徒乘
朱班輪呵殿嚇問閑如儼帶面具應遭鬼笑玩而況新
失職誰肯聽呼喚坐令公困窮旅突幾不爨蔚然鸞鳳
姿胡為雜鵝鸛我實憎此曹期君遊汗漫

次韻曾育才翠樾堂雪詩

哦君翠樾堂中雪詞如劒戟相磨切又如牛鐸應黃鍾
水中躍出筵賓鐵因誦東坡憶雪詩城郭山川兩奇絕
翠樾堂中雪復然敢擬片詞增鼠竊長安道上醉騎驢

忍凍不知蹄屢蹶爭似淮西破賊時
蔡州城外沙如月將軍一箭射欖槍
夜落城頭曉方滅捷書飛奏不動塵
露布馳來迷玉闕醉翁句律號令嚴
凍口何由更開說銀杯任逐馬蹄翻
斷藁殘編且局鐸

送趙逢源赴趙提點辟

臬司近年浸鐵成銅以足國用使者與公皆賢

宗室故以
比子政云

曩日逢君盧水頭來如天馬初伏輶
忽然去作幕下士奮袖起如鷹脫鞴
黃雲壓空欲成雪笑捧辟書還御闕

王孫俱是天麒麟枕中有方能點鐵

同陳思忠訪洪覺範

尋春反向僧房卧無乃行藏與時左起來刮目覽新詩
花壓欄干夢初破黃葉丹楓屬興深吁然莫測疑楚些
惠休島可沒已久二百年來無此作世間何處著斯人
秀句天教出寒餓我氣未衰詞頗弱欲借鼓旗聊一佐
終朝巖下不逢人苔色應嗔馬蹄沓

次前韻酬劉美中

筆勢爛斑如虎卧何止風流蓋江左新詩吟出鸞鳳音
曉鶯未啼春欲破始知李白飄然思俊語天成安用些
鳳簫聲不類人間王管定非人所作可憐洛下書生冷
雷轉空腸發清餓終日長哦學不成掩鼻皺眉相贊佐
與公並轡且西遊舉扇勿憂塵土浣

贈忠襄公二孫

乃翁精忠貫日月一門挺秀俱琅玕丹山飛來兩雛鳳
碧梧翠竹皆停鸞武陵溪邊忽相遇口角流涎誦詩句

盧溪摩頂欲作語他日雲霄還記否

送安成知縣周子發

公家伯仲方持節江淮發
運提點荆湖刑獄公今又

趨朝故
有是作

安成斗絕吳楚東妖氛未息仍歲凶公當是時宰斯邑
眼底日厭旌旗紅北兵初冠中原地驛騎符移星火至
衆方敲捶立威名公能使民歌愷悌公家人物自魁雄
弟兄蹀躞騎青驄端能經世任國事同時獻納蓬萊宮
繡衣持斧今無對虎節麟符照湖海行看三鳳接雲飛

共濟艱危熙帝載

酬聶達夫惠所業

聶郎贈我長短句大盤小盤堆玉助當年持此驚市人
破帽蹇驢誰借譽厭聞百鳥呼春風自作綵鳳鳴孤桐
俗間惡語敗人意胡不謁帝明光宮

酬劉英臣載酒送花

去年花下探春雨鳴鞭走馬看花開今朝危坐空山裏
不識春從何處來誰云山中春亦好忽見花枝被花惱

無柰窮愁輒賦詩對酒簪花能絕倒

次韻劉謙夫同年二首

子雲昔獻長楊賦詞傾江海濤翻素溪邊相遇覽新詩
陣馬迎鋒敢馳驚忽憶楓宸賜第時青袍紛紛莫知數
與客流落最多年不記紫騮花下路

蒼龍闕下同充賦偶著青衫脫寒素當年千佛共題名
勢若飛黃正騰驚此時入彀多英雄只今豈可一二數
朱輪丹轂滿人間亦有傾軋猶載路

次韻張子春賦瑤林春色

余瑤林洞中以醪
醪作麴因為酒名

花間酌酒邀明月月照金罍佳興發
鯨吞霧捲百川空
醉挽醪醪落香雪便將壘麴築糟邱
醪醪壓膏麥為麴
釀成忽見張公子公子家居近丹闕
為余乘興誇洛陽
笑指沙頭卧雙榼洛陽視此真草野
敢辱新詩借牙頰
瑤林名字出風塵未遇知音那敢說
況能大讀離騷句
痛飲雖多不為餐未識王家碧玉香
髣髴東坡真一訣
誅茅本結方外人豈用禮法相分別
預拂瑤林一片石

與君醉過清明節窮亦不足悲達亦不足悅酒闌拔劍
露肝膽正恐不免論功業

和陳栢臣見贈

北人愁聽江南曲細草新蒲幾回綠當年避敵初渡南
千官蒼黃飯不足中原亂後又逢春邊頭只道無烟塵
邇來公卿不生事此事必屬非常人我曹生長江南樂
豈料翻成風土惡湖海元龍氣尚豪贈我新詩何璀璨
拾遺後出最能文脩椽大屋今荒墳遠孫高材淹管庫

猶能落筆生烟雲山城相遇初相喜共論大梁人物美
莫學夷門抱關吏謀竊兵符推晉鄙

和胡子敦實少年行

酒酣坐待東方高臂鷹走逐城南豪彎弓射殺白額虎
醉騎歸馬雪花毛日暮黃雲動天色易水迷魂招不得
莫學并州遊俠兒徒費黃金飾韉勒

暴雨初晴

馮夷聒天夜椎鼓盡驅羣龍起行雨阿香推出雷公車

惡風動掣不周柱似聞帝坐清霞宮號令羣龍收惡風
便令萬物有生意虞淵取日當春空

觀李氏畫

壁間冥冥雲塞川細看幻出江湖天寒鴉雪壓凍不喧
沙尾忽有瀟湘煙黃蘆碧草鴈初下畫此千金不當價
為君覓紙一題詩詩不能工且觀畫

李仲孫佩軒

我友李仲孫飭身一何介被服古衣冠昂然偉而怪開

軒蓬戶中紉蘭以為佩布袍揖公卿脫幘卧江海方其
得意時天地不能礙荷鋤入深林剪薙發幽薈清芬動
窓壁蕙若連光彩君看紫綬翁腰垂黃金帶璜玕錯琚
瑀印章如斗大步趨踏龍尾鏘然中音會豈如此香草
擢秀繁霜外秋風落萬木臭味久逾在我思軒中人免
食三年艾夢寐欲見之一往清鼻界

酬劉震仲

憶對秋風與公別風吹雲開露明月高談不作儒生酸

舌翻波瀾吐奇絕今朝馬首從西來笑我窮愁不極揭
蟠泥蛟螭氣如蜺不肯一吐人安知要令光彩射月脇
五色萬丈天南垂我聞此語中夜起誰與揮翼白日馳
低心逐鶩駘青衫走塵土何當大醉騎鯨魚凌烟飛過
蓬萊渚

送南臺長老

并序

本老遊吾州數年余固知其名而未識面也忽飛
錫赴南諸侯之請訪余於溪上談論亶亶獵取孔

孟莊周之言以證彼大事此又談禪而無蔬笋氣
者也奇事奇事余聞南臺古禪窟大師時之偉人
其往也必不為彼寂寂故作數語以贈行

祝融峰畔南臺路傑閣危欄上雲雨繡木泥金好佛堂
撞鐘擊鼓聞瀟浦瀛洲仙人東道主缺招提境中住請
公說法也大奇要公別下一轉語

盧溪文集卷三

欽定四庫全書

盧溪文集卷四

宋 王庭珪 撰

古詩

次韻方性夫同年見寄

禮經久顛龐不絕僅如帶諸儒共補葺紛然莫酬對
先生隱桐廬議論有根蒂劒胸剔廢滯電眼亦作燭幽晦

糞鹽二十年時節忽已屆聲名塞天宇筆舌翻清瀨
美蓬萊宮輝赫輒自怪文彩動人主英風特飄灑清芬

掩幽蘭四海共紉佩平生慕忠義爛漫意常在坐閱諸
公間誰與論梗槩著書逢休運一洗窮愁債駸駸度驂
騑過都如歷塊嗟予強追躡常負跛鼈態雖登龍虎科
異調愧當代才高自激烈無為逐時輩

和施倅重陽日謝予送酒

東坡異時談醉鄉怒罵嬉笑成文章其中廣莫幾萬里
脫略禮法侔鴻荒初無愛憎與喜怒豈有寒暑與炎涼
後世乃與醉鄉隔糟粕始變鵝兒黃三杯危坐亦拱手

儼如冠劍侍君王淵明不飲時節改霜風九月籬菊芳
舉頭忽見南山翠便覺逸氣登羲皇揮毫落紙得佳句
流涎露頂庸何傷甕下被縛烏足取定無奚童攜錦囊
安用船頭置百斛又令口不離杯觴醉翁飲少輒已醉
胸中了了初不忘八仙脫醉尤可笑騎馬落井何其強

題禾山蕭秀才卧雲菴

江南山盡頭氣狀頗英淑禾山倚天開蒼翠滿林麓扶
輿磅礴起橫斷湘江曲中有隱君子結屋在深谷未放

雲出山蟠雲卧幽獨暮簷青潑眼遠靄寒山竹景色嘉
有餘幽人夢初熟起看柱礎潤山前雨應足

題劉端禮步芳橋

橋上畫欄低壓水青龍影落芙蓉底欲渡芙蓉望翠微
波面紅雲映屐齒洛浦清流古有神羅襪凌波生暗塵
東昏戲作錦地茵金蓮襯步如花人而今此事墮渺茫
但有荷花開蕩漾試穿芒屨踏風煙安用紫絲連步障

余棄官累年劉元弼作詩見勉次韻奉謝

我生寡結交論議誰與質憤氣不可蟠龍蛇走鬱律少
年學奇字費力弄紙筆不讀五十卷亦慕入此室腰間
插櫛具談兵尤縱逸時方用巨人顧我何品秩往年承
平久出師無紀律群盜尚縱橫豈但開邊失皇威振海
岱戈甲耀霜日自可掃欃槍掩耳驚雷疾故人起閭巷
宿昔登近密聲焰動四方風雲生咤叱犬羊猶爛漫氛
氣何時畢感公贈以言欲往非儔匹此事恐不免高卧
安敢必

送駱仲武

淵明不喜折腰趨寧作

缺

笏何易于勸農使者鄙丈夫

少年新進安識渠下馬怒煩虬奮鬚指揮星火飛文符
詈辭愧語每不無諸公止欲求薦書椎斷肌骨尋高腴
公為一笑憐其愚熙朝成法字已孚堅如金石莫可渝
鞭且勿施安用蒲三年竟亦無逃逋吏民遮道相懽呼
生立叢祠傍佛區想當逸氣吞江湖與人恆疏無怨吁
臨邛小子傲鄉閭方乘朱輪呵道衢公歸西山結茅廬

丹崖絕壁巉空虛誰能負弩當道隅終日與爾為前驅
送周覺民兼簡湘西故人

蒼山凍雲垂欲雪風吹客衣冷如鐵忽乘狂醉夜敲門
不畏苦寒來訪別時朝騎馬雪中歸何處皺眉吟雪詩
若見湘西舊同舍為余傾廩說相思

段居士栗菴

若人胸臆著萬卷始信此菴藏大千維摩室中坐獅子
蓮花鬚上集人天十方國士從坐起聚此一粒空中圓

爾時寶刹現毫端跳出雲門向上關癡兒正抱古公案
對面不納須彌山便向栗中尋世界含元殿裡覓長安

題周忘機畫軸

舊聞周忘機隱於浮屠如洪覺範之流然未見其畫也紹興乙

丑清明日觀於任子嚴書室王某題

羅浮飛瀑落九天尺素倒流三峽泉怪底晴窓起風雨
洞庭野色瀟湘煙平生江山入吾手況有對坐南昌仙
不須作此無聲畫妙畫自以無聲傳

次韻李教授閔雨

赤帷使者朱斑車重簷飛蓋遮日烏佛前下馬來跪爐
草木焦卷苗欲枯我亦本是耕田夫僅能識字勤須臾
吟詩閔雨作時無空勞皺眉捋髭鬚安得年豐鼓不桴
便足飽飯甘樵蘇

觀徐明叔畫湘西磨崖圖

崖在湘西白鶴峯紀官軍破賊

衡山高出北斗邊九疑蒼梧相屬聯羣峯環走如却立
山脚插入瀟湘川朱陵渺邈迷處所白鶴噴薄飛流泉
坐看徐郎拂絹素盡驅山岳置眼前徐郎豈是真畫手

酒酣遊戲乃其天巴陵洞庭連浦淑鯨鯢蟠穴為賊淵
詔謂將軍出旗鼓樓船蹴踏驚浪喧櫓槍夜落照湖水
雕弓十萬猶控弦湘西古寺最奇絕丹崖翠壁開何年
况公文章善叙事大字怪偉宜鑱鐫中書異時觀落筆
因煩吮墨圖凌煙孟公韓公毛髮動腰鞍大羽冠進賢
他年中興事可考公名亦與茲山傳

和介甫少狂喜文章

少狂喜文章頂戴千佛名年大意轉拙腸饑猶舌耕筆

扛百斛鼎詩當五言城儻無封侯骨止是識字氓長
安公卿中閱人如踐更扁舟苟能辦自足了一生

贈劉允升

并序

紹興三年歲在癸丑暮春三月允升自湖南李相
公幕府歸致相公之意因留數日洽甚作詩以贈
之

我家神螺峰與子隣井閉聞名初識面逸氣起天半坐
久語翻瀾詩文星斗爛刺口論世事極能原治亂洗我

冰雪懷韻出眉宇燦遂于交遊內得此一好漢自言長
沙來幕府天下冠相公秉旄鉞英僚照藩翰辟書欲交
飛置我在門館事繫國輕重忽逐雲雨散請君企踵待
勢若馬脫絆他年恐未免成此奇一段

劉端行自建溪歸數來鬪茶大小數十戰予懼
其堅壁不出為作鬪茶詩一首且挑之使戰
也

亂雲碾破蒼龍壁自言鏖戰無勅敵一朝倒壘空壁來

似覺人馬俱辟易我家文開如此兒客欲造門憂水厄
酒兵先已下愁城破睡論功如破賊惟君盛氣敢爭衡
重看鳴鑿關春色

次韻酬向縣丞

平昔君家瀛閣老少日結交名譽早眼中忽失如此人
尚喜諸郎美風調前年寄書識英妙經歲初酬君勿謂
後會相逢應可期顧我形容未枯槁

送叙浦令宋元老總幹

輶車昔參使者騶萬里粟帛咸括搜荆蠻小縣天一陬
却來執板拜督郵督郵偃蹇聊復爾鶴書夜逐秋風起
我冠端恐立螭頭汗脚行當踏龍尾公家有兒纔毀齒
背誦六經如瀉水九重天子念勤勞今試禮部收英髦
願作文章驚四海他年一釣連六鰲但知工部好驥子
勿怪將軍尋鳳毛

題惠崇畫秋江鳬鴈

老宗學畫如學禪中年悟入理或然長江未落鳬鴈下

舒卷忽若無丹鉛定自維摩三昧裏半幅生絹開萬里
不用并州快剪刀斷取鐵圍山下水

往年見趙德麟說惠崇嘗自言我畫中年後有悟入
處豈非慧力中所得圓熟故耶今觀此短軸定非少
年時筆也故詩中云爾

次韻傅彥本三首

介子齋金持漢節欲斬樓蘭言剴切建康家譜不傳人
萬口謳謠同一舌仍聞載書盈幾車指甲生花掌卧蛇

祖風凜凜世不乏笑我窮山採巖芽

友琴安用胡公節簾捲鳴弦自清切忽聞飛語衝駭機
亦慮過時聽反舌仁風西來隨傳車揮毫落紙蟠蛟蛇
正逢久旱得霖雨一洗槎枿皆萌芽

國步未寧誰仗節慷慨談兵多感切當時日厭五侯鯖
子雲筆札君卿舌爭如不識金銀車亦無字畫能驚蛇
且吟老杜江頭句細柳新蒲又吐芽

用前韻贈歐陽公制

垂髫與君相折節初學吟詩開又切君仍抵掌能劇談
至今濤瀾翻頰舌人生讀書須五車要當赤手捕長蛇
不然是事且略置時過松窓煮雪芽

盧溪文集卷四

欽定四庫全書

盧溪文集卷五

宋 王庭珪 撰

古詩

雅歌樓詩送永豐宰卸晉卿

潢池赤子弄庫兵犬牙蟠接度漳汀十年烽火照縣郭
白晝不敢開衙庭忽見青樓臨大路樓上高歌揮白羽
樓前解角看投壺終歲不聞撾戰鼓主人坐嘯已風流
小婦鳴箏樓上頭曲罷仍能雅歌舞送君此舞傳中州

送董袞臣提舉并序

湖西提舉董公館于方外幕中月餘日得報杖屨
之遊每聽高論慨然有經世之志忽聞大丞相李
公來鎮長沙即日撰裝走臨川以迎謁謹書長句
叙別因以送行

小菴遂在青林裏高軒大馬從何至慨然吐論翻濤瀾
茅簷為我清風起忽傳承相下湖東羣兇落膽先摧鋒
便欲磨盾作文檄捷書飛入甘泉宮丞相參謀虛位處

會看出奇兼破虜席卷江湖波浪清貂鼎勲庸歸自取

次前韻酬董叅臣使君見寄

時公知岳州

少年通籍金閨裏持節荆湖已三至巴陵江水天上來
樓觀崢嶸半天起使君才氣雄山東豪曹巨闕誰爭鋒
譙門高開洞庭野鼓角震動魚龍宮此中景致最佳處
讌間不復談征虜題詩遠寄江外人政恐六丁來下取

再次韻酬岳州董使君

間去歲妖賊犯境即時擒滅

西望岳陽煙霧裡聞有璽書天上至增秩何年下鳳凰

初無草動風塵起我生飄泊任西東孤軍敢犯千人鋒
郢中白雪豈容和牛鐸輒應黃鍾宮郡樓把酒題詩處
笑命騷人等奴虜不憂笑境有狂夫立遣偏裨生縛取

江虞仲生日

正月十四日

王春正月東風回星橋鐵鎖明夜開鼇山千仞接雲漢
平地五色移蓬萊公家今夕果何夕適逢間氣生英才
清都虎豹失呵禁九關轉鈕驅河魁爛柯山頭瑞煙起
太白之精天上來却來人間知幾載少日聲名震寰海

太學高文擅俊場江南刺史多遺愛江邊父老祝長年
南極年來一星在明年此夕從宸遊鼇山正出鼇頭外
新鶯百囀柳初青龍池鳳閣遙相待

李真狂過盧溪盧溪慮其狂之無所歸作狂語
歲之

江南有狂客氣欲橫九州朝為長安市上遊暮出簣中
思報仇皇天恐爾狂不休囚鑕置之東海頭盧溪為
脫千金裘換酒仍作商聲謳醉來騎折六龍背醒後槌

碎黃鶴樓摩霄拔劍斫月窟何如投筆亦封侯白晝殺
人誇意氣何如煙雨卧漁舟

和周通判永豐破賊

五更盾上聞磨墨夜半偏思破殘賊平明露布已成文
倚馬不知軍務劇初傳別駕下南州人如天馬徠西極
指揮猛士驅貔虎坐使威聲馳絕域單于昔渡西樓山
漢皇不閉玉門關四方羣盜蝟毛起旌旗光拂牛斗間
回戈必定東征去鎧仗如雲光照路捷書飛入甘泉宮

挿羽鳴鞭氣橫鶩公家人物世不衰況復詩名天下知
探驪得珠何崛竒更欲盡採珊瑚枝

題李伯時畫馬

秃筆戲掃凡馬空人間始識天廐龍山城逼窄那得有
注目萬里生長風奚官緩牽紫絲鞵好頭不著黃金籠
時平諸番盡入貢此是玉花于闐驄

劉偉明家藏名畫數軸其姪時發得之以示余且求
余跋而以李伯時畫于闐驄馬為惠余愛其善寫神

駿之姿非伯時不能也復跋其後而藏之

送向豐之

君家梁苑妙人物
羯末封胡咸勃窣
子今二十能綴文
詩如陣馬敢馳突
此去荆湖道路長
要吟秋水動三湘
歸時蕉葉應黃落
賸入騷人春草香

和周秀實田家行

早田歲逢六月尾
天公為叱羣龍起
連宵作雨知豐年
老妻飽飯兒童喜
向來辛苦躬鋤荒
剗肌不補眼下瘡

先輸官倉足兵食餘粟尚可瓶中藏邊頭將軍耀威武

捷書夜報擒龍虎

近報殺退龍虎大王

便令壯士挽天河不使腥

羶汙后土咸池洗日當青天漢家自有中興年大臣鼻
息如雷吼王帳無憂方熟眠

再和酬王元勃舍人見寄

風電聒天雷動地老父閉門呼不起從教岑却屋上茅
偶遇時豐且歡喜閭閻比歲連旱荒椎肌斷骨生千瘡
羽書止欲調兵食不貯別庫為私藏吾君撥亂如光武

將軍不數韓擒虎龍神自將羽林兒折箠一揮開北土
誰識江南刺史賢政平訟理仍豐年村中儻無石壕吏
吏不捉人人夜眠

贈蔣山僧

并引

蔣山僧覺海持劉美中書來茶陵予以解官過海
於廬陵作數語送之俾遊雲陽尋定佛果祖師道
場以乞丐於衡湘間

雲陽秀湘南祖刹隱林嶠曾出老古錫今尚

闕

神

駒過江來羈勒不受敲潮音震海湖乞食徧蠻徼遣子
尋故岑飛錫出泥淖端能破慳貪亦須硬觜爪定林枕
雙溪門前風水開一派遶鍾山歸時可自照

沅陵遇公美忽談道術如有所得將之桃源作
詩送之

昔年結屋並江灣見君心膽方未閒牆東月出夜扣關
酒酣說劍翻濤瀾適來書劍謀俱左尋仙欲鼓蓬萊杓
三寸田中已發花九曲江邊仍進火蓬萊萬里天無涯

驚風落葉卷黃沙且過桃源訪秦洞玉盤應飢棗如瓜

贈寫真徐濤并引

世言畫工喜作鬼魅謂荒誕易圖也故傳神寫照
為難聞徐濤畫盧溪老子作幅巾芒屨蕭散之狀
見者以為甚似作詩求之

徐生畫人不畫鬼點目加毛必佳士邇來下筆更逼真
勿論山僧及童子會貌詩人孟浩然便覺灞橋風雪起
如今儻欲畫盧溪一菴宜著深巖裏

贈高伯強

高郎讀書有何好如魚蠹書終日哨爨烟不屬長苦饑
行吟安得追風驃羣公頓網加羅搜未肯放子出一頭
先生上堂應勞苦向來白壁何時酬

和歐陽叔向寺丞韻酬劉漸父

渤海赫赫東南豪俯挹前輩傾時髦有如青天白日出
平地放著崑崙高都下官寮車可載聲稱寂不聞中外
二陸初來浪得名謬以尊羹誇捷對文章直要窺孔顏

不可睥睨馬與班君門九重耀晶戟遠臣胡得來其間
清新不見庾開府寂寞詩壇將無主縱使揚雄識字奇
劉歆泣歎空自苦也知未遇何足悲時來忽睹青雲低
鳳凰孤鳴得天律百鳥束喙不敢啼先生能作鳳凰語
議論遠過袁虎子豈惟一日動朝廷留作詩人後來史
汪洋尤喜陳時議一夜稱嗟豈徒謂九衢傳寫已喧闐
氣壓五侯驕七貴螺江地古人物好迄今故老猶能道
醉翁沒後頗荒涼秀氣盤旋此環抱天恐斯文久遂終

英靈挺出嗣家風身雖富貴異流俗兩眼觀書耳亦聰
應曾夜半參黃石神幾暗得無蹤跡我本閒愁寡才力
閑叻逢君那喘息

郡齋次張參政韻呈王舍人

使君天下士豈止臨一州此州久廢亂弄兵非鼠偷使
君醫國手頓若沈疴瘳下免北征苦上寬南顧憂壞堤
防蟻穴回瀾障東流潢汙與行潦咸可供薦羞幕府羅
俊彥巨細靡不收天生一世入異趣各有求廬溪老病

叟十年不浪遊失脚入城府本自非人謀賢侯新下車
採贖加窮搜隣里輒驚怪出門爭挽留平生江海思

缺

徑坐大孤秀猶沈百寮底竭來尉吾邦聲華愈暉暉諸
公用法律領略極不似輜軒日邊來願採書于紙

送通判周監丞

秋江水淨磨碧銅秋山先作歸意濃况逢星火羽書急
立馬不復能從容船中載書三萬軸鳴銃插幟揺秋空

前年羣盜尚蠡午眼底日壓旌旗紅行春兼督貔虎士
破賊屢奏明光宮今年豈料煙塵起赤白提囊走邊吏
縣官飛符急索租誰能急了官中事不如置笏還縣官
頭巾脫掛西林寺詩句留傳天地間時有人來問奇字
功名正恐未免耳此役由天不由已

盧溪文集卷五

欽定四庫全書

盧溪文集卷六

宋 王庭珪 撰

古詩

送趙敏卿

翩翩公子天麒麟目光點漆傾坐人
萬里肯來尋逐客
夜夜讀書喧四鄰
君今先渡瀟湘水
我亦東歸聊復爾
明朝勅放巫山陽
拄杖行穿赤泥尾

題洪覺範方丈

曲徑通禪房闢戶得佳境適從闌闌至頓覺耳根靜古
木含蕭森寒梢發光景墻圍數竿竹中藏大千境月從
天上來入林散清影爐焚薰佛香盃注浮雪茗客散羣
動息茲焉發深省

次題周公子趙逢源過瑤林洞中探醪醕

桃花落盡春風顛兩翁並轡來翩然入門下馬看花發
仰攀綠葉窺青天倚檻謳吟發清唱終夕擁鼻鳴寒蟬
唐昌仙人識玉蕊借月下看乘飛煙明朝地上拾落粉

草間點綴如遺妍
狂思玉爪搔背痒
不可安得麻姑鞭

歸來

缺

應拍手笑君騎馬似乘船
醉後猶能作長句

半夜打門驚我眠

送葉通判赴闕

乃翁共試蓬萊殿
筆力翻瀾瀉河漢
聯鑣並出日華門
燕罷綴行風雨散
家聲烜赫今益昌
高車大馬何煌煌
江頭相遇初識面
握手一笑仍悲傷
獨把窮愁老巖谷
喜見高年有此郎
如今又作摩霄去
行看鐔玉侍明光

送僧祖麟遊龍會

大仰古禪窟秀色摩空蒼蜿蜒屬龍會半壁開寶坊中
有寂寞人宴坐花雨傍杜門不說法碧眼照胡床子昔
喜行脚拄杖走四方所至螺鼓鬧正作佛事忙是中不
可住令人心發狂却尋龍會山夜深聞妙香起望山上
月千山同一光從來遠行客終必還故鄉便當隨月歸
急掃松下房芒屨儻已具留錢辦茶湯

避亂東村逢南嶽簡上人

一別湘山今幾載盜賊縱橫爾猶在北來鐵馬獵夷門
金錯旗竿繞湖海憐我避亂荒村中杖錫穿雲窮蠹窟
茅簷淪茗清風生月隱霄間星磊磊高談微及古興亡
為言致禍由時宰著屐包腰却下山恐觸危機吁莫米

送劉宏夫昆仲赴省試

我聞君家書滿房騎馬夜過叢桂坊乃翁危坐具燈燭
諸子讀書喧兩廊問君讀書一何苦要取高官起門戶
仰天大笑幾時歸明年雙鵲刺雲飛

次韻韓朝美惠硯

詩如春風入花骨暖日晴雲入竹石退之筆力千古豪
世有文章擅東壁松窓結鄰翁乃惜坐中頗復有此客
人怪窮兒得寶歸布袖淋漓手黧黑

次前韻酬羅思義

君章夢吞五色翼未羨充宗得文石遠孫詞采亦班班
復見光芒動奎壁我住江南君住北北人今作江南客
論詩爭勝類搏捕一喝成盧子俱黑

次前韻酬周公子年家

君家大阮聲輝赫當年並試龍墀石
小阮風流不減人
一家頗有雙聯壁共題鴈塔多名卿
溪頭獨作漁竿客
身經離亂偶相逢怪我婆婆鬢猶黑

次前韻酬劉大虛惠端硯

端溪之水深莫測千夫挽縷下取石
溪翁採得歸不眠
夜劖鵲卵出蒼壁君從何處得此寶
贈我慚非玉堂客
况無健筆寫銀鈎墨汁徒翻老鴟黑

王舍人生辰作

道書有金房四年之訣皆鑄金為簡刻白銀編之紫筆書文也

己巳四月二十四甲子夜半天門開是時羣星環北斗
一星謫墮人間來星精為人不異得千年孕秀方呈才
筆扛龍門百斛鼎家傳鳳閣通銀臺螭頭獻納近日月
論事力取天顏回中興文武收髦俊願公急起乘風雷
野人指山祝公壽事業亦與山崔嵬金房難老自有訣
銀編紫筆磨松煤

贈彭時卿秀才

時卿昔年上書言得失不報今以親喪旅于江上有窮愁之厄

恐墮其志故
作此詩遺之

昔年待詔隨公車袖中獨有平戎書當年肉食無上策
奇才劍客何時無從來謀國忌迂儒遂令此賊稽天誅
君能再陳治安策親喪未舉宜何如休論忠孝不兩立
一杯之土非難圖莫但扣門來夜話長纓終請羈單于

六月上澣陪王元勃舍人攜客遊青原山周秀
實通判作韻語紀一時勝集奉次元韻

使君從千騎伐鼓驚羣偷前驅嚴虎節夾道森蛇矛別

駕工五言句刮造化美筆法蟠高軒銀鈎照窓几冠蓋
一時盛秋旻羅衆星尋思問祖意米價作麼生欲扣山
中人何由知彼岸殘陽下峰頂暮色藹餘清鳴珂出修
竹驅車轉平原登臨悲往昔豈不多名賢獨餘姜與顏
人品亦自勝溪流水濺濺中堪理漁艇賓客隨太守風
流幾百年山間留絕唱巨石枕橫川

送劉義夫宰祁陽

浯溪寒翠拖碧玉石崖硤砢凌蒼霞次山奇文走霹靂

顏老健筆蟠蛟蛇凜如誚叱希烈至今傑立天之涯
公於其間宰民社切勿但取文辭誇當用忠壯出奇節
縣妖破膽莫敢譁官舟連檣泊溪口符移星火如撒沙
舊聞俗苦吏囂惡端能病政使不嘉先聲入境若元氣
顧見槎枿皆萌芽溪中古月溪上石照公清德無纖瑕
溪流不盡石不老佳名萬古磨不磨

次韻羅伯固聽琴

焦桐初不受文理弦以朱絲竒乃爾坐中忽聞太古音

寵辱頓忘那有恥官廳曾有一日閒奏刀未覺肯綮難
抱牘兩衙鳬鴈退目送飛鴻聊一彈爽氣朝來如有約
幽林鳥語山間樂琴罷揮毫各賦詩滿袖珠璣何璀璨
晚風歸袂失炎蒸却憶冰壺此段清酒醒月白重開匣
更作松風夜雨聲

彭青老往禾山讀書所寓之室曰蟄菴為賦蟄
菴詩一篇送之兼簡白雲元老

彭子擔簦行有日拄杖穿雲風雨疾主人好事家有書

卷埒石渠吞藏室茲遊遠去栖碧山頭角未欲斬斬出
泥蟠谷底茅屋深丹崖青壁幾千尋白雲老元坐禪窟
笑汝猶作書生吟峰頭別打禾山鼓喚起蛟龍趁雲雨

題向巨源南昌樓詩後

并序

昔年過豫章望南昌樓知其必有勝處欲一登而
不果今觀向巨源四詠果與滕王閣爭江南臨觀
之美始恨昔年怱怱不獲一寄目以償所願輒作
數語題其後

南昌高樓在何許亦面西山望南浦壁間有客舊題詩
傾倒湖山入毫楮此公平生妙言語突過前人落霞句
簾開月出大江橫定勝滕閣捲山雨

贈蜀僧妙高并引

蜀僧妙高自峨眉出三峽為南嶽幹佛事至辰陽
適余竄居是邦高數相過又將去遊江湖吳越之
間索詩為別

峨眉山頭古時月浮雲捲盡塵埃滅曾隨僧宴入中京

光照九天開玉闕山月如今亦送君影落洞庭波底徹
此時看月憶峨眉山色湖光兩奇絕明月隨君却復東
千里相思共吳越問言古月與今月水鳥風林盡能說
溪邊惜別重吟哦顧我無才奈若何他日長安逢李白
再乞峨眉山月歌

戴國和得潘衡墨法於意言之外今攜之湖湘
必有識之者作詩以送之

老潘膠法秘不傳君獨得之乃其天此法髣髴如參禪

忽然有省夜不眠又如神仙換骨法應手不自知其然
湖東大帥天下賢詞源如海筆如椽本是玉堂揮翰手
正要此物供磨研醉題李白三百首掃盡將軍九萬牋
老^缺歿來知幾年聲名始落瀟湘川君不見呂洞賓行
絲藍子烏紗巾長安市上無人識喚作湖西賣墨人

送彭秀才赴國學試

君厭江南卑薄鄉擔簦萬里趨虞庠虞庠黌舍中天起
上游英俊如堵墻子欲戰藝於其場亦須旗鼓能相當

但得同升博士堂看取官職如驅羊



廬溪文集卷六

欽定四庫全書

集部

盧溪文集卷七至十五

詳校官左中允_臣瑋五珠

主事_臣呂雲棟覆勘

總校官知縣_臣楊懋珩

校對官中書_臣潘奕雋

謄錄監生_臣湯汝梅

欽定四庫全書

盧溪文集卷七

宋 王庭珪 撰

古詩

遊貢游洞

竄身楚西極，幽竒頗窮歷。况此古道傍，橫天竦蒼壁。何
年始開鑿，工如鬼鑱刻。飛空數百丈，突出清鯨額。那知
風雨時，雲雷非窟宅。事跡墮渺茫，探討失圖籍。豈無高
世士，於此煉金液。不能久徘徊，上馬空歎息。

次韻折樞密題向萍鄉莞爾堂

器遠無近用弦歌只暫娛從來趙魏老或為滕大夫昔
時武城宰其人骨已徂牛刀發新硎夫子輒驚吁向侯
本學道與世疑濶疎擁紬聽衙鼓庭下一事無不為赫
赫名詭衆以自殊催科雖云拙於今乃賢歟夫子儻無
言黑白共一區家有治縣譜不飲常晏如棠陰決民訟
松間讀我書飛蝗避境土野鶴馴階除堂上盛賓客不
減陳趙予新詩播京邑異世乃同途振轡若登仙身輕

衣六銖雲間候飛馭君駕何時迂

寄賀魏彥成郎中

扶桑日出天開關江南太守初賜環駕行舊班三尺脚踏他龍尾回天顏是日奏對驚衆目措國不動安如山為郎畫省非常調民曹金穀徒煩要江淮久鬱鸞鳳姿一飛宜上青雲表政使垂紳坐廟堂南北封疆談笑了君不見河南魏弱翁治行聲聞九天上漢室中興拜丞相

謝魏彥成知郡寄惠漂布

江南渡頭浣紗女
年年舟上織白苧
織成還自漂江沙
女手纖纖白於布
水邊時有釣漁人
何異淮陰漂輕絮
一飯能識韓將軍
不負平生名漂母
州西寒士衣百結
太守憐渠茅_缺
作練衣倒接離
炎官火傘方張設

恨無青絲白玉鞭
醉騎白馬踏江月
誰知南國任公子
留待深冬禦霜雪

昔徐仲車為山陽教官太守程公見其衣敝以新衣易之仲車因思南齊

仕昉之子冬衣絺綌遂用其事作詩以謝漂布亦暑服比絺綌尤精奇故復用之

題向宣卿伊山有裕堂

伊山連屬朱陵邨公來力掃衡山雲便令築堂隱其下
萬竹遶堂松作門此公文簡四葉孫奇謀遠畧世所聞
胷中磊砢著千古雲夢豈止八九吞憶昔荆湖盜初起
乞得兩郡西南奔至今衡陽道州政父老出涕猶能言
負材傑異衆所忌使者不便仍謗諠宗閔羞作南山虎
李斯却憶東門兔壁後置人誰不知傾身障麓情已具
何曾日食一萬錢猶言舉案無下箸貪嗔俱是可憐人

百憂纏身誰得汝請君聽我伊山行九疑洞庭皆可耕
清風不用一錢買時有明月窺簷楹其中廣莫幾萬里
寵辱微物安能驚自非冒懷有本趣其氣激烈何由平
安得中郎捋鬚手喚起桓伊來撫箏

桓伊嘗居此山亦嘗與謝安有功而

遭謗故用撫箏事

題劉知縣後隆堂

五季列壤爭未休庸兒崛起操鉏耰朝為吳臣暮歸楚
黥髡盜販更據州君家大傳出奇策氣壓百萬姦夫謀

一朝談笑解紛亂辭爵却歸東海頭自言其後必隆盛
慶源遠與江河流昔時楊寶所活一黃雀猶能四葉清
德傳至彪又聞何敞陰功唯治獄天遣使者賜策何其
優有如大傅安堵十萬戶宜令後世衮衮生公侯

贈別劉文卿

楚公之孫

丞相諸孫早相見子獨羈遊未識面忽騎瘦馬夜敲門
始得此郎如小阮通都大邑多豪英乃走窮山訪微賤
忽忽未暇世論文會看落筆知關鍵

題王主簿逸老堂

人生異趣各有托年少何如老人樂老來萬事不掛懷
樂處勿憂兒輩覺疾雷破山吾不驚亦賴天教閒處著
兩部池蛙當鼓吹萬疊雲山作屏幕此時真似地行仙
拍酒何須萬斛船不愛白日昇青天不愛腰纏十萬錢
但愛百年三萬六千日日對芳樽聊自逸明日花開花
更好定知不向愁中老

題羅氏餘慶堂

蒼崖翠壁前人居猶識當時屋上烏應念前人餘澤在
飛閣突出青山隅山前老父相叫呼為起里門高著櫨
葱葱瑞氣已充間他日要容高蓋車

送劉熙載赴省試

江南山欲窮地與荆楚錯君生於其間秀氣鬱磅礴文
章變骯髒聲名久洵皓至於吐言談風味亦不惡如何
生寒窘詩書對藜藿天網羅英材搜獵徧叢薄君材萬
人敵百鳥避一鶚忽從布袖中盈編出新作奇怪驚我

前雷電雜風電行當試殿陞宏文要追琢同遊三數公
詞藝俱瞻博上方集多士謀欲取京洛徑須陳治安端
不說冗齷致身青雲上去天纔一握早寄山中人庶以
慰寂寞

贈劉亞稷

君家大父當元祐賦壓鄉閭在人口子今二十能綴文
已觀落筆蛟蛇走藍田出玉果不非豈知剖蚌得珠璣
乃翁高材卧林壑眼中有此光陸離炯然見子侍公側

鵷雛翠倚碧梧枝嘗聞鵷雛之生破卵出五色即欲摩
天飛陸機少年作文賦河東小鳳才亦奇自古有英物
秀發皆如斯我謂鵷雛排風整毛質翦拂始光輝尚須
琢琅玕之寶飲瑤海之池然後巢阿閣集赤墀赤墀阿
閣無凡棲期子當呼鳳來歸

謁王宣子舍人

垂旒畫袞雲繡裳天子擇日開明光臨軒策士必親覽
鴻文獨高翰墨場都人爭看狀元出九衢車馬何煌煌

貴名一日動天地破卵挿翼飛鸞凰螭頭獻納近日月
謂公遠器宜廟堂麟符虎節下霄漢雙旗忽開南斗傍
朝廷已知弱翁治行且大用歸巖廊江邊野老病初起
始欲杖策窺門牆

張元暉生日

三月十六日

春風吹月昨夜圓門對新生洲渚邊紫文鸞鷺初入夢
燕公手筆大如椽赤松黃石俱長年金鈎鵲印仍家傳
劒池霹靂蛟龍吼寶氣飛精射牛斗人呼張鎬帝王師

相公元是山中叟

和王宰早梅

雪裏花開冰未折如見瑤姬侍君側
瑤姬國艷欲傾人嫣然一笑頰齒白
疎影橫斜語最奇桃李凡姿無此格
瀛上休觀倒暈眉且看嬌黃塗半額

贈歐陽伯威

歐子扶親喪崎嶇度湘巘豈無當塗人
孰肯為封傳跣足行萬里僅能及鄉縣
埋玉謀荒山此計墮瀾漫世無

郭元振一舉四十萬積微會衆力庶可咄嗟辦

送頗姪郡學讀書

郡侯勤勸駕英聲播江濱學官得鴻儒筆頭弩千鈞金
蘭二三友執經造其門歐陽子劉子試藝咸有聞吾姪
奮袂起去若渴驥奔妙推天地假高談帝王尊入室得
妙語錄寄青溪邨

還劉秀才文卷

君家邇來妙人物叔父風流更超絕中興天子搜羣材

龍虎同年收羯末我識君家鐵面公當年作賦聲摩空
君今祖襲乃復爾自出機杼成家風惠我新編盈大軸
武庫五兵森在目縱橫璀璨不知名玄圃崑山皆積玉
文章磨治欲無瑕要如春風開百花筆端著力覩天巧
自我^缺發成嘉葩

和通判周監丞見贈

大厦久撞壞撐拄非一支安得好柱石壯麗如昔時向
來榮盛處草木今紛蕤羣材未盡出去若馬脫羈豈期

朝無人過之輒欲私骨相不媚嫵因歸結茅茨忽逢高
軒過飄然鸞鳳姿宜在帝左右珥筆班龍墀少年歷清
貫高名誰不知胡為至下邑撫俗問民疵題詩滿巖谷
妙處有餘師

盧溪文集卷七

欽定四庫全書

盧溪文集卷八

宋 王庭珪 撰

古詩

和趙叔清蠟梅

春入梅花邛蠟粧
林影繁香肌冒寒
立此意為誰存宮
額半塗黃要為出
俗韻不露冰雪姿
風流真素蘊

江亭候施倅醇翁阻水漲作詩寄之

夜雨漲溪碧
天明望歸舟
飛帆出木杪
浩蕩兀中流
洪

崖仙人姿謂落滄海遊興盡却回棹待此霖潦收抱琴
出竹迎倒披翠雲裘風濤正可久煙波生暮愁

施肩吾
得道於

洪崖公
其裔也

聞郡中請賢老住報恩作詩贊之

夜郎佛刹接西土誰敢招提境中住老賢元是住山人
拄杖無心自來去山中猿鶴不須驚明朝聽打禾山鼓
鼓聲新響振人天水禽草木咸歌舞

贈羅道人

余昔遊湖南聞羅道人而未識也忽相遇於螺浦
之西鬚髯如畫神鋒甚偉又出時賢所贈詩益知
其有以異於人也亦作一首贈之

道人渴飲石縫漿鬚髯墨黑兩頰光或云公是伯休那
又疑楚有接輿狂倒騎白鹿渡湘水獨識老翁跳玉堂
他年賣藥長安市乞我仙人不死方

贈蜀僧無觀

蜀僧無觀善相自謂未能遍閱天下士意江海山

林之間必有異人行當訪之於其別也贈之以詩
師出峨眉西極天萬里一衲雙行纏朝遊名山暮滄海
不著脚踏諸方禪眼中自有識人物行盡江南山水窟
紫雲深處有神仙高馬達官無此骨溪頭惜別強吟哦
顧我無才柰若何他日長安逢李白為乞峨眉山水歌

次韻胡邦衡衡陽縣瑞竹堂

牆裏圍脩竹竹間開草堂經春多夜雨入夏長新篁節
抱幽人操風敲明月瑞孤根元獨立並幹兩爭長影落

龍蛇動清移枕簟涼門常對衡岳氣足傲羲皇日射玲
瓏色林疎瑣碎光雙莖非別種異物出時方海嶠名雖
久湖湘跡愈彰行當卧龍起天為見珍祥

和胡觀惠詩兼致守倅招延之意

伊昔橋門盛環觀壁水春一鳴先折桂百拙誤謀身
憔悴湘江曲淹留京洛塵思歸緣竹鶴靜念愧朝紳
顧我蓬蒿賤逢君海岱珍贈言多溢美秀氣發清淳
本出東臯裔元非水北人山靈回俗駕幕府盛談賓
駿骨千金

重沙鷗萬里馴人生各有趣忍負接羅巾

和施倅歲暮感懷

野濶生愁興時危無定居淵明傷倦鳥張翰憶鱸魚
宦路風波惡交情勢利疎謀生成齟齬欲進復躊躇盜賊
猶猖蹶田園未墾鋤君王圖治切新下急賢書

近有詔求直言

和歐陽廣明竹間桃花

雨罷新花明曉日竹陰瑣碎錯黃金牆頭過盡雙飛蝶
葉底巧啼何處禽玉女洗粧勻淺淡老龍脫繯著青深

柔姿敢並高標立直節時容粉面侵愛客分明莫來折
坐興徑造不妨尋挑花落後春事已唯有清風滿竹林

盧溪文集卷八